

АКАФИСТ
ПРЕПОДОБНОМУ ОТЦУ НАШЕМУ ГРИГОРИЮ,
ИЖЕ НА ПЕЛЬШМЕ РЕЦЕ,
ВОЛОГОДСКОМУ ЧУДОТВОРЦУ

Кондак 1

Возбранный угодниче Христов, святе Григорие, яко благий раб вшедый в радость Господа твоего, моли Владыку небесе и земли подати нам благодать свыше, с терпением до конца понести благое и легкое иго Его, да зовем ти, якоже чада ко отцу: Радуйся, угодниче Христов Григорие Богомудре.

Икос 1

Ангелов лица твоему великому во спасительных подвизах терпению удивишася; и мы, ублажающе благодатное звание твое на служение Господу, радостно возглашаем тебе: Радуйся, от пелен избранный Богу; Радуйся, добротами Духа издетска украшенный. Радуйся, чистотою душевною возсиявый; Радуйся, знамения благодати яве в себе носивый. Радуйся, древо, насажденное посреде Церкви Божия; Радуйся, цвете Божественнаго сада. Радуйся, благовозделанная лозо винограда Христова; Радуйся, от юнаго возраста тесным путем шествовати избравый. Радуйся, от младости себе Христу возложивый; Радуйся, угодниче Христов, Григорие Богомудре.

Кондак 2

Видя благая мира сего скоротечна и непостоянна, ум твой ко Творцу возложив, пренебрегл еси рода светлость, лествь богатства временнаго, и от юности возлюбил еси возлюбившаго тя, еже взывати к Нему: Аллилуиа.

Икос 2

Разум лжеименен ко спасению ведя, озаритися свыше восхотел еси: сего ради с разумом и волю в послушание пленяя вере, в терпении восхотел еси стяжати душу твою. Тем и мы, от отрочества тя избранный сосуд благодати ведяще, вопием к тебе: Радуйся, Духа Святаго благоприятное обиталище; Радуйся, благодатный плод в души твоей возделавый. Радуйся, насаждение во дворех дому Бога нашего красно процветшее; Радуйся, ангельское житие возлюбивый. Радуйся, от младых ногтей стезям подвигоположника последовавый и душу твою Богу сочетаваый; Радуйся, сладости плотскаго сожития богомудре презревый. Радуйся, яко изволением Божиим и родителие твои соизволиша, да работавши Христу; Радуйся, яко возлюбив нищету некрадому, богатство родителей твоих оставил еси. Радуйся, яко рабы твоя и рабыни свободив, всего себе Христу поработил еси; Радуйся, угодниче Христов, Григорие Богомудре.

Кондак 3

Силою невидимою веден был еси в незнаемая и непроходимая места, егда убягая славы человеческия, честь и достояние земное оставил еси, пришел же еси во обиталище неведомо, хотя в скорбех научитися пети: Аллилуиа.

Икос 3

Имея твердое предложение до конца оставити мир, по преставлении честных родителей твоих, вся имения твоя нищим и убогим раздал еси, да стяжеша себе сокровища на небеси, егоже обрести сподоби и нас, песнословящих тя: Радуйся, славная мира сего во уметы вменивый; Радуйся, яко душею твоею предложивый собрати богатство нетленное. Радуйся, в веселии сердца крест Христов на рамо твое вземый; Радуйся, христолюбивыми трудами крепость духа стяжавый. Радуйся, слезами, яко рососою, душевную ниву напоивый; Радуйся, тщавыйся не себе, но Христу жити безстрастием. Радуйся, совестью чистою в молитвах аки безплотен бывый; Радуйся, на богокрасную доброту взирая, от плотския доброты око твое отвративый. Радуйся, постом, бдением, воздержанием лествицы мира и плоти низложивый; Радуйся, угодниче Христов, Григорие Богомудре.

Кондак 4

Бурю страстей, во плоти человечестей волнующуюся, от юна возраста укротити тщился еси, егда в сердце твое начало премудрости страх Божий всадив, и быв исполнен им, николиже детским глумлением примешался еси, но во дни и в нощи закону Божию поучался, песненно глагола еси: Аллилуиа.

Икос 4

Слыша труды и подвиги богоноснаго Дионисия, ученик был еси его: преуспевшее в добродетелех его, обитель нову наздати восхотел еси. И мы, вкушающе ныне плоды трудов твоих, в веселии воспеваем: Радуйся, в подвизех великому Дионисию соревновавый; Радуйся, в силе Христове Евангельским путем шествовавый. Радуйся, бдением и молитвою душу твою очистивый; Радуйся, лестницею добродетелей на мысленное небо возтекий. Радуйся, смирением высокая, нищетою богатая стяжавый; Радуйся, обитель яко сад небесный насадивый. Радуйся, в подвизех образ иноком бывый; Радуйся, пустынный жителю, в телеси ангелом подобивыйся. Радуйся, безмолвия любителю, духом твоим в вышних обитаваый; Радуйся, угодниче Христов, Григорие Богомудре.

Кондак 5

Боготечное к Царствию Небесному совершая шествие, потщался еси в любви Христове и иных на стези правыя к нескончаемей жизни направляти, да умудреннии тобою во спасение зовем: Аллилуиа.

Икос 5

Видевше владыцы и князи людстии благоразсудливость и добродетели твоя, преподобне, искаху просветитися и пользоваться от тебе, якоже сотвори князь отечественныя страны Юрий, егоже чад крещением просветил еси. Темже восхваляем тя: Радуйся, истиннаго разума учителю; Радуйся, пути, вводящаго в жизнь, наставниче. Радуйся, прилежно обучавыйся и обучавый благочестию; Радуйся, верно утверждавыйся и утверждавый в православии. Радуйся, покланявыйся Богу духом и истиною; Радуйся, служивый Ему во исповедании устен и сердца. Радуйся, веры истинныя блюстителю; Радуйся, уставов и законоположений Церкви хранителю. Радуйся, иноков богосветлый вождю; Радуйся, угодниче Христов, Григорие Богомудре.

Кондак 6

Проповедуют вернии миротворение твое, преподобне, егда услышав нестроение двух князей, единаго низвержена со престола, другаго же нагло похитивша чуждое наследие, потщался еси шествовати в царственный град Москву и примирению княжеску послужити, да при восприятии к нимждо своего воспеваша с ними: Аллилуиа.

Икос 6

Возсия ревность твоя по достоянии Христове благосерде, егда строптивый князь Димитрий прииде злобно на град Вологду со ратию и многа зла людем сотвори; ты же небоязненно обличив неистовство его, яко миротворец, безчестие и поругание претерпел еси. Сего ради видяще миролюбный подвиг твой, достойно восхваляем тя: Радуйся, мира и правоты в людах блюстителю; Радуйся, мщения и злобы от сердец искоренителю. Радуйся, твердый защитниче невинности и неправедных умышлений обличителю; Радуйся, градов и граждан умирителю. Радуйся, готовый в напастех защитниче; Радуйся, властолюбия прогонителю. Радуйся, от смут и треволнений житейских исхитителю; Радуйся, ходатаю о людах пред Богом и пред князи людий. Радуйся, яко тобою познаем, коль красно быти в мире; Радуйся, угодниче Христов, Григорие Богомудре.

Кондак 7

Хотящу ти спасти чад, тобою собранных, любовь, корень всех благих, заповедал еси имети им между собою, юже хранящим обещал еси ни в чесомже имети оскудение. Испроси и нам у Человеколюбца Христа благодать братолюбия, да поем: Аллилуиа.

Икос 7

Нова тя показа Господь угодника и всей Российской, паче же Вологодстей, стране; обитель бо уготовав себе Духу Святому, обитель для спасения иночествующих создал еси, в нейже труды ко трудом прилагая, хриstopодражательный

пример учеником твоим оставил еси, наньже взирающе, тебе вернаго наставника восхваляем: Радуйся, благодати жилище в себе уготовавый; Радуйся, доме Духа Святаго, дом для приметающихся к дому Божию устроивый. Радуйся, пустыно-любный орле, для птенцев твоих пустыню мира избравый; Радуйся, наставниче безмолвствующих. Радуйся, на воде покойне слез и умиления воспитавыйся; Радуйся, тоюжде пищею поста и воздержания и последователей твоих питавый. Радуйся, силу Христову в немощи явивый и тоюже силою благодушно немощи немощных носивый; Радуйся, молитвенниче, молитвы твоя о врученных тебе прилежно возносивый. Радуйся, темиже молитвами стадо твое утверждавый; Радуйся, угодниче Христов, Григорие Богомудре.

Кондак 8

Странно и пришельчески жительствовати на земли Христа ради изволивый, странное для сущих от мира житие пожил еси: долу бо горняя мысля, и на земли небесная дея, и в мире сый не был еси от мира. Темже мы, ублажающе небесное на земли жительство твое, глаголем Богу: Аллилуиа.

Икос 8

Всем сердцем предан был еси Христу Богу в животе твоём, богоносе, Ему же и работал еси в преподобии и правде; сего ради и Господь, видя труды твоя, бдение же и пощение, еще в жизни прослави тя подвигами святости, яже воспевающе, тебе глаголем: Радуйся, тайн Божиих верный строителю; Радуйся, верный священнодействователю служения Господня. Радуйся, светильниче, на свещнице благодатнем поставлен-ный; Радуйся, бодренный делателю вертограда Христова. Радуйся, мудрствовавый яже во Христе Иисусе; Радуйся, яко дея учил еси презирати плоть, прилежати же о души, вещи безсмертной. Радуйся, плоть уму, а ум духу покоривый; Радуйся, духом ходивый и похоти плотския отгнавый. Радуйся, различными страстьми боримым помощниче; Радуйся, угодниче Христов, Григорие Богомудре.

Кондак 9

Всякое тщание прилагал еси, богоблаженне, еже вознагражденную от тебе обитель соделати вертоградом благоплодным, да делателе его, наслаждающесе во время свое плодами трудов твоих, воспевают согласно Богу в день вечнаго веселия: Аллилуиа.

Икос 9

Витии многовещаннии суть деяния жития твоего, имиже, яко благоглаголивыми устами, научаеши нас возвещати хвалу Господню и глаголати к тебе: Радуйся, богомудрая доброто; Радуйся, небесный человеке и земный ангеле. Радуйся, смиренномудрия рачителю; Радуйся, светильниче, в нощи мира сего нас озаряя. Радуйся, заповедий владычних бодрственный блюстителю; Радуйся, шествующих путем Христовым спутниче и водителю. Радуйся, колеблющихся в

вере утверждение; Радуйся, ослабевающих в подвизех укрепление. Радуйся, световодителю блуждающих в стезях стропотных; Радуйся, угодниче Христов, Григорие Богомудре.

Кондак 10

Спасти хотя во обитель твою притекших, егда познал еси отшествие твое от мира к премирной жизни и от трудов к покою, призвал еси братию твою, юже, яко добрый пастырь, наставив работати в мире Господу, вручил еси их нову игумену, душу же твою Богу предал еси, воспевая: Аллилуиа.

Икос 10

Стену крепку в немощех и забрало неборимо от всяких наветов вражих, показа тя Вседетель чудодействием во святем преставлении твоём: начавшу бо совершатися обычному надгробному о тебе пению и целованию последнему, бесный изцеле, и одержимый болезнию очес инок тогда же исповеда пред всеми внезапное свое изцеление; обрадованная же братия и ученицы, видевше таковое прославление свыше своего пастыря, воспета единими усты: Радуйся, авво всеблаженне, бодрственно совершивый добрый подвиг; Радуйся, к премирному возшедый пребыванию. Радуйся, класы присноживотия пожавый; Радуйся, благодать чудес от Бога приемый. Радуйся, бесовския полки победивый; Радуйся, вся стрелы лукаваго разжженные угасивый. Радуйся, море житейское благотишно преплывый; Радуйся, к нестареющей жизни прешедый. Радуйся, небесный покой онаго века улучивый; Радуйся, угодниче Христов, Григорие Богомудре.

Кондак 11

Пение благодарственное в сердца выну принося Христу, приведшему тя непреткновенна посреде сетей многих; обаче от многаго смиренномудрия, во очищение души и тела твоего, дивная пред отшествием твоим завещал еси: да тело твое, на немже носил еси язвы Христовы, егда скончаешися, влекше ввергнут в блато. Благоговеющая же ко отцу чада, по преставлении твоём, честне предаша земли тело твое, провождающе дух на небеса светлую песню Богу: Аллилуиа.

Икос 11

Светозарную лучу духа яве показал еси и в богоноснем теле твоём, егда в преставлении благоухание разлился от мощей твоих и цельбоносная сила истече, яко от источника, последи же и мощи твоя нетленны явишася. И ныне, в не вечернем свете с праведными ликовствуя, по достоинству слышиши от нас: Радуйся, верный рабе и друже Божий; Радуйся, за верность твою вшедый в радость Господа твоего. Радуйся, известивый звание дела; Радуйся, праведным житием твоим собравый лик шествующих по тебе к Богу. Радуйся, светильниче, светяй и горяй о нас пред Богом; Радуйся, вознося к Богу молитвы наша, яко ка-

дило. Радуйся, путевождю к Царству Славы; Радуйся, деннице, являющая зрящим горе солнце правды. Радуйся, пристанище взыскающим благодати небеснаго; Радуйся, угодниче Христов, Григорие Богомудре.

Кондак 12

Благодать Господа Иисуса исполни сердце твое дарами Духа Святаго в житии твоём, а по смерти осия ты славою безсмертия. Мы же, от раки мощей твоих восприемлюще токи благодати, напаяющая души наша во спасение, всеконечно вопием о тебе Богу: Аллилуиа.

Икос 12

Поюще твое досточудное житие, богоблаженне, восхвалити тебе недоумеваем по достоянию; обаче горяще любовию к присноживотней памяти твоей, не умолчим вопити тебе: Радуйся, течение постническое добре скончавый; Радуйся, путем правым непреткновенно шествовавый. Радуйся, яко сеявый слезами, ныне плоды спасения в радости пожинаеши; Радуйся, земными подвиги небесная дарования стяжавый. Радуйся, яко в мире жизнь скончавый, в земли кротких достойно водворяеши; Радуйся, яко священник во священницех и пустынножитель в пустынножителех жребий твой восприял еси. Радуйся, зрением лица Божия веселяйся; Радуйся, во славе небесней Престолу Пресвятыя Троицы предстоай. Радуйся, о обители и стаде твоём, еже трудолюбно собрал еси, моляйся; Радуйся, яко от всей Православной Церкви и благочестивем царстве Российстем выну предстательствуай. Радуйся, угодниче Христов, Григорие Богомудре.

Кондак 13

О священная главо, преподобне отче Григорие! Моли непрестанно Христа Господа, да не оскудеет в нас вера и святии подвизи твои, да будет мир в братии твоей и обилие во ограде обители твоея и во всем мире Господни; тогда исполнятся радости сердца наша и язык наш веселия, и вси воспоем единими усты Владыке Богу: Аллилуиа.

(Этот кондак читается трижды, затем икос 1 и кондак 1)